

DATE: 3/12/2010

Malaysia penghubung komuniti China di Asia

UKA-3-12-2010
KUALA LUMPUR 2 Dis. - Datuk Seri Najib Tun Razak berkata, Malaysia berada di kedudukan terbaik untuk menjadi saluran yang menghubungkan komuniti China di Asia.

Menurut Perdana Menteri, dasar perdagangan terbuka Malaysia, suasana mesra perniagaan dan kerjasama kukuh dengan beberapa kerajaan merupakan antara asas kejayaan negara dalam membangunkan ekonomi serantau.

Tambahnya, perdagangan dua hala dengan China, Hong Kong, Taiwan dan Singapura pada 2009 telah mencatat RM289 billion bersamaan 33 peratus daripada jumlah perdagangan global negara.

"Untuk tempoh sembilan bulan pertama 2010, perdagangan Malaysia dengan negara-negara tersebut

meningkat 36 peratus berbanding tempoh yang sama pada tahun sebelum itu," katanya pada majlis perasmian Forum Perniagaan Cina Antarabangsa Malaysia di sini hari ini.

Teks ucapan beliau dibacakan oleh Menteri Perdagangan Antarabangsa dan Industri (MITI), Datuk Seri Mustapa Mohamed.

Turut hadir timbalannya, Datuk Mukhriz Tun Mahathir; Presiden Gabungan Dewan Perniagaan dan Perindustrian Cina Malaysia (ACCCIM), Tan Sri William Cheng serta 700 hadirin termasuk 250 delegasi dari luar negara.

Najib menambah, ketika perdagangan melimpah ke seluruh rantau ini, ia juga menyaksikan peningkatan pelaburan dari Singapura, Taiwan dan China serta Hong Kong.